

Maya kekikenindaman nakág tódósh manidjósh shábwánamásachigani

Awegonen tash tódósh manidjósh?

Tódósh manidjósh mikaganiwe tódósh kákiganing. Ondji mádjise pakehidiwin okidj tagon pemi ijámigak tódóshánabo ashidj indaje kágige mikawowadj manidjóshan Ontariong.

Awegonen tash manidjósh shábwánamásachigan?

Manidjósh shábwánamásachigan kwagwe djisiganiwedj awiyeg konima ayáwadj manidjóshan, konima kaye ká'n kego wábandjigadesinon ashidj konima minomandjiwo. Kakine Ontariong tagon awaso inanokíwin kidji nong tabaság nibowin ondji mígiwedj ayápích shábwánamásachigan.

Keget konima minwáyáwin ondji tódósh manidjosh shábwánamásachigan

Ayáman shábwánamásachigan ondji tódósh manidjósh wíbadj, apích inanokí ábadjitówin nánahidág ondamítamagag. Shábwánamásachiganiwidj mónjag mámawi tabasá nánahidág kidji nibodj ondji tódósh manidjósh.

Awenín kedayápan shábwánamásachigan?

Ikwewag, Níj-Odey pemádizidjig, wídj pemádizi ashidj pikán wídj pemádizidjig endasopibóneziwadj 40 ako 74 pagidinak ondji OBSP kishpin:

- Ega ayámowadj tódósh manidjósh kesháwadj ákoziwin
- Ega kí ayámowadj tódósh manidjósh
- Ega ayámowadj kishkijiwan okákiganing (kidji akonadj níj tódóshan)
- Ega ayámowadj shábwánamásachigan ako ishkwe 11 kízison
- Igeg pikán ikwewag ashidj ábadjitowadj ikwe mashkíkí ondji 5 pibón kágige

Nanízánizi entasopibóneziwadj 40 ako 74

Mámindji awasogog entasopibóneziwadj odayánawadj OBSP ta oditináwa inanokí ábadjitówin miziwe 2 pibónigag.

Kishpin entasopibóneziyin 40 ako 49, kinandawenimigo kidji kijenindaman nakág kishpin manidjósh shábwánamásachigan wanishishin ondji kín. Wendjida, pemádizidjig igeg wínawa ayánawa tabaság nahidág kidji ayámowadj manidjósh ákozowin eshkegog pemádizidjig entasopibóneziwadj 50 ako 74. Ganój kinandokoniním, mashkíkíwe konima kaye madwesichigen Health811 kidji wídokágon kishpin kidji odapiniman shábwánamásachigan.

Kida oditinán na Eshpág Nanízánig OBSP?

Konima kida oditinán Eshpág Nanízánig OBSP kishpin endasopibóneziyin 30 ako 69 ashidj kishpin pikán inápinen (násáb BRCA1, BRCA2), eshpág nahídog kidji ayáman manidjósh nakág kidódemag konima kín mino pimádiziwin konima kaye píndigemagak kego okákiganing. Kidji andokikenindaman awashamenj, ganój kinandokoniním konima kaye mashkíkíwe, konima kaye mawadishiwe [Ontario Health \(Cancer Care Ontario\)](https://www.ontario.ca/cancer) mizimizidenandakikenindjigan.

Mámidonenindan: Ganój kinandokoniním konima kaye mashkíkíwe kishpin kego pikán wábandaman ándjise nakág kidodóshimag, kayesikádj odjishizi konima kaye miskwág ega mádjámagag konima kaye ándjise kiwánakotódóshim. Ashidj, mámawi wendjising ándjigowin konima kaye tódóshkewin odagádon kesháwadj tódósh manidjósh konima kaye ega wábandjigádeg, mí tash kichi kikenindágog iye.



Andjisege kego tódóshiming ká'n kágige ijisesinon nakág manidjóshiwidj, anisha tash kidagikenindagog teshagodj.

Anín keda oji-oditinamán inanokí ábadjitówin?

Wábam OBSP abinás kidji oditinaman inanokí ábadjitówin. Kidji mikaman abinás, madwesidjigen 1.800.668.9304 konima kaye odisáw ontariohealth.ca/breastscreeninglocations.

Inanokí ábadjitówinan sóngenindágwad, ká'n kego enagindágosinon ashidj kida oditinán ega eshkwemag wenzikág kinandokoniním konima kaye mashkikíkwe.

Anín ejisege apích inanokí ábadjitówin tagon?

Iye inanokí ábadjitówin kwagwedjitowin ábadad shábomazinázowin ondji tódósh wíyaw.

- Shábowabidj ashidj kikenindang awiyeg ogadisán pejig tódóshan shábomazinázowin potágan.
- Onáganigan nayegádj nísándaweshka kidji magoshkang ashidj kidji mindjiminang tódósh wíyaw. Kidatagon nánind magoshkan tadatabizeg, ánín ká'n inapinádj wíyaw.
- Inanokí ábadjitówin mawanjihidiwin 15 odápinán tibahigan.

Anín ejiwebag ishkwáyádj inanokí ábadjitówin?

Kíshpin kego minobideg, kiga oditinán mazinehigan. Awaso mazinehigan kikenindamóg anín apích ayáman shábwánamásachigan minawádj.

Kíshpin ega wa ondjisin awaso wíkwadendamowin konima tódósh manidjósh akoziwin kidayánmádog anisha tash ká'n ijinágosinon kidji pimosendaman kwagwedjitowadj. Kín OBSP abinás ogawíndamowan kinandokoniním konima kaye mashkikíkwe ashidj kidayán eshkwemag ánín apích kidji ayáman kwagwedjitowin. Kíshpin ega ayáwadj nandokoniní konima kaye mashkikíkwe, kigamínigo pejig kewídókág.

Inanokí ábadjitówin ká'n kágige onishisinon.

Konima bakida ayán ega wanishishing endawábandamowadj, kíshpin ega ayáman manidjósh, awaso ijinikáde ká'n tebwe wanishishisinon. Ká'n tebwe wanishishisinon kego násáb igodj kikenindagozi manidjósh (odápinan pangi wíyaw).

Inanokí ábadjitówin konima kaye ká'n mikawásín manidjóshan, ta ijinikáde ká'n-ketinange. Ká'n-ketinange pangamiseg tagoshinomagad wíkád mino wídokázowin.

Inanokí ábadjitówin konima odamikawan manidjóshan konima ega tagon mino pimádiziwin ánimenindamowin, ánín iye ta ijinikáde wagidj wakikenindamowadj. Wagidj wakikenindamowadj konima pagamise ega mámakadj mókomán konima gaye andawíwewin.

Anín kedaje nánjináman nahidág kidji oditinág tódósh manidjósh?

Nánind nisán pakwenigan (kegoshish iye eshpág nahidág oditinaman madji ákoziwin) ká'n ándjisesinon, násáb entasopibóneziyen, ekoziyen, kín tibinawe kiwíyaw megwádj pimádzin, násáb igodj wíbadj onewizin konima kaye ayáman onewiziwin kinawe nánáge). Anishá tash tagonon 4 kegoshish kedodaman kidji nánjináman ega ayáman tódósh manidjósh:

- Ká'n minikwen konima kaye minikwen nónd ishkodewábo
- Póntón sagaswen konima ká'n wíkád sagaswáken
- Kágige pabakijjawizin kágige pimádzin
- Ká'n awashamenj apítinigoziken

Awashamenj wíkenindaman inakág tódósh manidjósh shábwánamásachigan, enabigis wábandan ontariohealth.ca/breast

